



揣頭路

我照新聞啟事的地址，行人去一間不止仔有派頭的公司欲允頭路，這箍攏無擔頭的老闆，共桌頂的履歷書類繩(tsîn)誠久，才用彼款袂啥恰意的氣口問一寡有的無的，像講你攏毋捌食過頭路，敢有才調做外務、收貨款？定定無晝無暗、無年無節的工課，會合無？你讀大學，一月日趁兩萬二的月給，敢袂克虧著你？問煞我隨誠細膩仔回話，講恰人客接接(tsih-tsiap)、盤攏的工課，著愛骨力走、綿爛從(tsông)就做有路來，這我會曉；閣再講我無某無猴，毋免飼老爸、老母，一人飽規家飽，應該有合；面會自按呢到遮煞，叫我轉去聽候通知。

行來車牌仔咬，就有巴士咧等，司機鉸票的時陣笑微微請我上車，閣有位通坐，來到車頭嘛隨有車逝通盤；佇車廂內，心肝猶暢暢，想講烏鼠鑽入去牛角，穩觸觸，後過的食穿攏免啥煩惱矣。

過轉工我攏毋敢烏白走，連繼五工日睇攏瞞瞞看咧等電話聲響起來，彼種燒烙真正毋是燥焮焮爾，顛倒是 hah 甲噤噤越(tshiak-tshiak-tiô)，袂輸鬼掠無著彼一樣。盍會知影第六工透早全款無影隻的時陣，人就有淡薄仔鬱卒，心肝冷一槓去，總是賸一點氣絲仔的向望，猶有咧著(tòh)。到第七工，連上尾彼點火星嘛即時化(hua)去，規個人忝甲強欲斷氣，袂輸啞口誓死罔，有話無地講。

敢會我面骨夯夯、兼碯頭，閣生做彼款免戴小鬼仔殼就會當去掠妖的歹看面的緣故，莫怪頭家看袂上目；抑是我本底都腹肚空空，親像冇蟳無膏按呢，三、兩句話就予人看破跤手，一聲就反片揸畚斗，攏免閣哭枵矣。

閣隔一個月，為著袂愛「大學」這二个衰尾字共我經跤經手，感心走去一間水電公司允頭路的時陣，我刁工剃 hái-kat 仔頭、穿一雙舊布鞋，講是高中出業的庄跤罔仔，才做兵轉來，料袂到這箍頭家人仔，連證書嘛無看，一聲就叫我明仔載來上班。我家己咧暗想，是毋是我予人看起來就是才高中的學歷，無彼種大學生的範勢，才會水漬船浮，一必一中。毋過，若欲稽考這內底有啥物緣故咧變鬼變怪，我就無真知矣。

作者：藍春瑞

☆詞彙學習☆

【擔頭】tann-thâu：抬起頭來

【繩】tsîn：定睛細看

【克虧】khik-khui：委屈

【盤攏】puân-nuá：交往；打混

【無某無猴】bô-bóo-bô-kâu：單身漢

【車逝】tshia-tsuā：班車

【燥焮焮】sò-piák-piák：非常猴急

【hah】：渴望得到

【火星】hué-tshenn：微弱的星火

【小鬼仔殼】siáu-kuí-á-khak：面具

【冇蟳無膏】phànn-tsîm-bô-ko：有名無實

【揸畚斗】tshia-pùn-táu：翻跟斗

【經跤經手】kenn-kha-kenn-tshiú：被纏住

【感心】tshéh-sim：索性

【hái-kat 仔】hái-kat-á：小平頭

【水漬船浮】tsuí-tinn-tsûn-phû：水到渠成

【一必一中】it-pit-it-tiòng：準確預測

【稽考】khé-khó：查考，追根究底